

Timoteuman San Pablo cartacushan 2

Tantiyacunanchipaj:

Pablo cay cartata isquirbiran Timoteuman. Timoteupita musyayta munar, 1 Timoteupa jallarinanta liguinqui. Cay cartata Roma carsilpita-pacha Pablo isquirbiran. Wañuchinanta mayar, Timoteo watucunanta munaran. Ichanga mana camäpacuranchu. Chaymi sumaj anyapänanpaj cartacuran.

Pablo isquirbiran:

Mana pingacullar Jesúspa alli willacuyninta willapäcunanpita: *2 Timoteo 1.1–18.*

Alli murucu capitanninpa shiminta wiyacushan-jina Jesústa wiyacunapita: *2 Timoteo 2.1–26.*

Jipata achcaj pantachicuj ricarimunanpita, mana uticällar Tayta Diosninchipa shiminta tantiyachicunapita: *2 Timoteo 3.1–17.*

Wañuy janančhu captinsi mana llaquicushanpita, watucuj aywananta munashanpita, janaj pachačhu Tayta Jesús alli cawayman čhurananpita: *2 Timoteo 4.1–22.*

Pablo wamayashan

¹ Timoteo, nuwa Pablo cartacamü. Washäcuj Jesúspa cačhanmi caycä. Tayta Diosninchicamacächiptin, shiminta willapäcur puriyä. Washäcuj Jesúspa shiminta čhasquicuptinchi, alli cawayta tarichimänanchi. ² Timoteo, wamrä-yupaymi canqui. Tayta Diosninchipis, Tayta

Jesucristupis yanapayculläshunqui. Llaquipay-culläshunqui. Allilla cawaycachilläshunqui.

Tayta Diosninchita alliman churashan

³ Unay yawar-masicuna llapan shungunwan manchapacushan-jina nuwapis llapan shungüwan Tayta Diosninchita manchapacü. Shungüchu ima juchatapis mana pacarächichu. Timoteo, pagas-junajpis jampaj Tayta Diosninchita mañacuycä. Mana jungajchu.

⁴ Llaquicur wagashayquita yarpar, yapay tincuya sumaj munaycä. Tincur, jatunpa cusicushäpaj. ⁵ Awillaryqui Loidapis, mamayqui Eunicipis llapan shungunwan Tayta Diosninchita wiyacushanta musyä. Chaymi jampis Tayta Diosninchita llapan shunguyquiwan wiyacushayquita tantiyacushcä.

Jesúspa shiminta willacur, ama pingacushuwanchu

⁶ Umayquiman maquiña churaycur mañacupti, Tayta Diosninchu yačhayta camapushcashunqui. Ama jasacanquimanchu. Manchäga yačhacushayquiman-tupu imatapis sumaj ruranquiman. ⁷ Tayta Diosninchu Espíritu Santuwan yanapaycämanchi. Chaymi imatapis ama manchacushuwanchu. Imaman chayaptinchisi, payga shacyächimanchi. Yanapämanchi runamasinchitapis llaquinanchipaj, imatapis sumaj tantiyacurir rurananchipaj. ⁸ Chaymi Taytanchi Jesúspita willapäcushayqui-janan, carsilman wičhgachimashan-janan pampaman churashuptiquisi, ama pingacunquichu. Manchäga Tayta

Diosninchi shacyächimashanchiman-tupu shiminta willapäcushun runacuna ñacachimaptinchisi.

⁹ Tayta Diosninchi jishpichimashcanchi.

Acracamashcanchi maquillančhu cawananchipaj Mana allita rurashanchipitachu acracamashcanchi.

Manchäga llaquipämashpanchi shungun munaptin acracamashcanchi.

Jishpichimänanchi-raycur Washäcuj Jesústa caćhamusha.

Mana imasi caycaptillan, llapanta camacächisha.

¹⁰ Tayta Diosninchi llaquipäcuj cashanta tantiyacushcanchina.

Washäcuj Jesús ricarimushana.

Payga Washämajnинchi.

Wañuytasi illarachisha.

Alli willapatapis tantiyachimashcanchi.

Shiminta wiyaptinchi, shungunchipis achicyacäcusha.

Mana ushyacaj cawaytapis tarichimanchi.

¹¹ Caycunata willapäcunäpaj Tayta Diosninchi cargüman ĉuramasha. Quiquin acracamasha

caćhan canäpaj, shiminta willapäcunäpaj, shiminta tantiyachicunäpaj. ¹² Cananga Tayta Diosninchipa

shiminta willapäcur purishäpita carsilčhu ñacaycä. Chaypis mana pingacüchu. Nuwaga Tayta

Diosninchiman yupachicü. Paypa maquinčhu cawaycä. Cargüta ĉarcushä junajcaman mana

caćharimangachu. ¹³ Chaymi Tayta Diosninchipa shungun munashanta ruranayquipaj shimita

wiyacunquiman. Washäcuj Jesúsman yupachicur, runa-masiquitapis llaquipanquiman. ¹⁴ Jesúspita

willapäcushaga sumaj alli. Chaymi carguyquita

čharcunayquipaj Espíritu Santu yanapaycäshunqui.
Payga maquinčhu purichimanchi.

¹⁵ Musyashayquinuypis Asia marcacunačhu
irmänucuna llapan-yupay jaguiraycamasha.
Figeluwan Hermógenespis jaguiraycamasha.
¹⁶ Irmänu Onesíforutam ichanga wasinpa
Tayta Jesús sumaj yanapaycullächun.
Onesíforuga mana yamacällar shacyächimasha.
Carsilarächimaptinsi, mana pingacushachu.
¹⁷ Manchäga Roma marcacaman shamusha.
Mana tarimashancaman jamaytapis mana
tarishachu. ¹⁸ Éfeso marcačhu puriptipis, sumaj
yanapämasha. Yanapämashanta musyanqui.
Chaymi payta llaquipashpan cutimushan junaj
Tayta Jesús alli cawayman čhuraycullächun.

2

Jesús-janan ñacar, ama llaquicushuwanchu

¹ Wawallau Timoteo, Washäcuj Jesúsga
llaquipäcjumi. Payga imačüpís sha-
cyächishunqui. ² Llapan runapa ricay ñawinčhu
willapäcushäcunata alli shungu runacunata
willapanquiman. Paycunapis Tayta Diosninchipa
shiminta tantiyachicunman.

³ Shiminta willapäcushanchipita tincuchiypa
tantiyacushun. Alli murucucuna ñacashan-
jina nuwanchipis Washäcuj Jesús-janan ñacayta
Čhasquicushuwan. ⁴ Murucu cashancaman
capitannin alli ricananta munar, čhacrančüpís
manash arunchu. ⁵ Pullandjis gänananpaj
siñalashan räya čaupillančhüshi pulland. ⁶⁻⁷ Chacra
runapis murupacushan puguptin, quiquinräshi

puntata micun. Tincuchiypa willapashajcunata tantiyacunquiman. Tayta Diosninchipis yanapäshunquipämi sumaj tantiyacunayquipaj.

⁸ Unay mandaj Davidpa willcan Washäcuj Jesústa ama junganquichu. Payta wañushanpita Tayta Diosninchi cawarachimusha. Chay alli willapata willapäcur puriyä. ⁹ Jesúspa shiminta willapäcur purishäpita ñacaycächiman. Cadinarcurmi juyu runata-jina carsilaraycächiman. Tayta Diosninchipa shimintam ichanga carsilarächiyta mana camäpacunchu. ¹⁰ Chaymi imaman chayarpis, Tayta Diosninchipa shiminta willacur purinäcashan mana rimacüchu. Chaynuy rurapti, acracushan runacunatapis Washäcuj Jesús jishpichinga. Shiminta chasquicuptin, Tayta Diosninchipis ñaupanchu mana ushyacaj cawayta tarichingapaj.

¹¹ Rasuntaáchi rimapäcupnis:
«Jesús-janan wañush carga,
Jesúswanmi imaycamanpis cawashunpaj.

¹² Jesú-janan mana yamacällar ñacarpis,
Jesústa mandäshishunpaj.
Wasguiptinchim ichanga,
Jesúspis wasguimäshunpaj.

¹³ Shiminchita mana charcuptinchisi,
Jesú shiminta charcun.
Alli shungu cashannuylla imay-imaypis cawa-

cun» nir.

Mana tincupänacunyanpaj willapashan

¹⁴ Willapashajta Tayta Diosninchipa ricay ñawinchu irmänucunata willapanqui. Llapanta yarpächinqui. Quiquin-pura ama

tincupänacuchunchu. Tincupänacurgá, imatapis mana jurgunchu. Wiyajcunapis Tayta Diosninchiman mananáchi yupachicunganachu. ¹⁵ Chaymi Tayta Diosninchipa shungunman tincunayquipaj alli aruj runa-jina aruyniquita sumaj mirachinqui. Willapäcurpis, Tayta Diosninchipa shimillanta tantiyachinquiman pingayman mana chayanayquipaj. ¹⁶ Tayta Diosninchita wasguipajcuna-jina ama rimanquichu. Paycunaga mana musyayninwan shimin atipashallanta riman. Tayta Diosninchitapis mana manchapacunchu. ¹⁷ Tincupänacucunapa yarpashanga jiri-jina miran. Paycunapa llupinpa jatirmi, Himeneuwan Filetupis ¹⁸ llutanta rimar puriycan. «Wañushcuna mayna cawarimusha» niptin, waquin irmänunchicunapis Jesúsman mananáchi yupachicunganachu.

¹⁹ Tayta Diosninchí yarpashanmi ichanga mana imaypis rucacanchu. Paypa shiminchú nin: «Maquinchú cawajcunata Tayta Diosninchí ricsin.»* Chaynuypis nin: «Tayta Diosninchita jayarajcuna jucha aparicuypita ashucunman.»

²⁰ Tincuchiypa tantiyacushun. Puchuy-puchuy jananchú cawaj runapa wasinchú achcash lätuncuna caycan: waquinga juripitash, waquinnash jillaypita. Waquinshi ichanga jirullapita, mitullapita. Waquintash alli ñawinpa rican, waquintanash mana. Chayjina runacunapis caycan. ²¹ Juchanpita wanacuptin, alli ñawinpana Tayta Diosninchí pitapis ricanga. Paypa shungun munashannuylla

* **2:19** Números 16.5.

cawar, shungunmanpis tincunga. Shungun munashallanta rurar, cawanga.

²² Müsucuna shungun munapashallanta ruran. Jammi ichanga Tayta Diosninchipa shungun munashallanta ruranquiman. Payllaman yupachicunquiman. Runa-masiquita llaquipanquiman. Llapan irmänucunawan allilla cawanquiman. Paycuna llapan shungunwan jayarar, Tayta Diosninchita manchapacun. ²³ Runa tincupänacushanman ama jaticanquichu. Paycuna upa cayninwan, mana musyayninwan chiquinacyllaman čhayan. ²⁴ Tayta Diosninchipa maquinčhu cawaj runa runa-masinwan ama tincupänacunmanchu. Manchäga llapanwan alli tantiyanacunman. Tantiyayta mana atipaptinsi, alli shimillanpa tantiyachinman. ²⁵ Tincupajcunataga alli shimillanpa piñacunman. Capasčhari Tayta Diosninchí camacächiptin, wanacunga. Wanacuptinga, shiminpis shungunman čhayanga. ²⁶ Chayrämi supaypa maquinčhu cawashanpita Tayta Diosninchí jishpichinga. Supaypis maquinčhu mana purichinganachu.

3

Jipata sasa caway cananpaj willacushan

¹ Timoteo, sumaj tantiyacunquiman. Jipataga sasa caway canga. ² Waquin runacuna runa-masinta mana llaquipar, quiquillanpaj yarpačacunga. Jillayllapaj wañunga. Sumaj-tucur alli cashanta musyachicunga. Alli-tucullar

puringa. Runa-masinta ashllinga. Maman-taytantapis mana wiycungachu. Yupay-tucuyllačhu cawanga. Tayta Diosninchita mana manchapacungachu. ³ Juyu cashpan cuyapäcuytapis mana yačhangachu. Jagayash cashpan piwanpis alli ricanacuyta mana yačhangachu. Tumpacullar puringa. Shungun munashallanta imatapis ruranga. Pasaypa juyu runa canga. Tayta Diosninchipa shungun munashannuy rurajcunatapis chiquinga. ⁴ Ishcay căra car, shimintapis mana čarcungachu. Pishi-yarpayyuj canga. Pingacuyninpis ushyacash canga. Shungun munapashallanta imatapis rurar, Tayta Diosninchipäga mana imasi jucungachu. ⁵ Runa ricanallanpämi payta manchapacuj-tucunga. Shimintam ichanga wiycuytapis mana munangachu. Chay-niraj runacunapita witicunquiman.

⁶ Waquincunana yačhaj-tucur warmicuna-raycullar juc runacunapa wasinman aywan. Warmicunapis pishi-yarpayyuj car, juchacushanpita llaquish car, shungun munapashallanta ashij car, ⁷ runapa shimintapis časquicuj-časquicujlla shuyaycan. Ichanga chay warmicuna Tayta Jesús pii cashantapis mana imaysi tantiyacungachu. ⁸ Chay yačhaj-tucuj runacunaga Janéswan, Jambréswan tincun. Paycuna Moisésta ticrapuran. Chaynuymi yačhaj-tucujcunapis Tayta Diosninchita ticrapun. Jucha aparicuyllaman chutacun. «Tayta Diosninchiman yupachicü» nirpis, shimillan riman. ⁹ Yačhaj-tucurpis, allíchüga mana llucshingachu. Upa

cashanga llapan ricay musyacanga. Janéswan Jambrés pingayman chayashan-jina paycunapis pingayman chayanga.

Timoteuta piñapashan

¹⁰ Timoteo, jammi ichanga sumaj purishimashcanqui. Llapan shunguyquiwan shimita chasquicushcanqui. Nuwa-jina cawashcanqui. Yarpashätapis tantiyacushcanqui. Yupachicushä-jina Tayta Diosninchiman yupachicuycanqui. Tantiyacushä-jina imapitapis tantiyacunqui. Llaquipäcushä-jina pii-maytapis llaquipanqui. Mana yamacashä-jina imaman chayarpis, ama yamacanquimanchu. ¹¹ Antioquia marcachu, Iconio marcachu, Listra marcachu jaticachar ushyamashantapis, ñacachimashantapis musyanqui. Tucuy-jinanpa ñacachimaptinpis, Tayta Diosninchchi jishpichimasha. ¹² Pipis Washäcu Jesúspa maquinchu cawar Tayta Diosninchipa shungun munashanta rurarga, chiquir ushyash cawanga. Ñacaymanpis chayanga. ¹³ Yačhaj-tucur juchačhu arujcunapa shungunmi ichanga waran-waran juyu cayman chayanga. Paycunaga yačhaj-tucursi, rimashanta mana musyanchu. Shiminta chasquicujcunatapis llutanta yačhaycächin.

¹⁴ Timoteo, jammi ichanga sumaj yačhacushcanqui. Shunguyquiwan Tayta Diosninchipa shimin chayash caycaptin, ama junganquichu. Nuwacuna willapashajta musyanqui. ¹⁵ Wamralla cashayquipita-pacha Tayta Diosninchipa shiminta yačhacushcanqui. Shiminta yačhacur, shungun yarpashantapis

tantiyacunquipaj. Chaymi Washäcuj Jesúsman yupachicushpanchi jishpichimänanchitapis tantiyacunchi. ¹⁶ Tayta Diosninchí quiquinmi shiminta isquirbichisha. Paypa shimin allim. Chaymi shungun yarpashallanta tantiyachicushuwán. Runa llutanta yarpaptinpis, shimin nishannuylla tantiyachicushuwán. Llutanta ruraptinpis, piñapäshuwán. Allilla cawananpaj anyapäshuwán. ¹⁷ Maquinchú cawashpan shiminta tantiyacurmi, Tayta Diosninchipa shungun munashallanta rurar cawanga.

4

Washäcuj Jesúspa willapanta imaysi willacunan-paj shacyächishan

¹ Washäcuj Jesús cutimur, llapan runata maquinchú purichinga. Wañushcunatapis, cawajcunatapis imata rurar cawashanpita tapunga. Chaymi cananga shimiña sumaj wiycunayqui. Tayta Diosninchipa ricay ñawinchüpis, Washäcuj Jesúspa ricay ñawinchüpis willapaycaj. ² Runacuna wiyaptinpis, mana wiycuptinpis, Tayta Diosninchipa shiminta mana yamacällar willapäcunquiman. Llutanta yarpaptin, juchaéhu aruptin, piñapanquiman. Chaynuypis alli shimillayquipa shacyächinquiman. Tantiyacurir-tantiyacurir paycunata yačhachinquiman. ³ Jipata runacuna Tayta Diosninchipa shiminta wiyayta mana munangachu. Manchäga shungunman tincushallanta rimajcunata ashinga. Paycunaga imatapis mishquichipayllapa yačhachinga. ⁴ Tayta Diosninchipa shiminta mana wiyayta

munar, upa-tucunga. Chaymi imatapis umanman chayashallanta rimar puricunga.
5 Jammi ichanga tantiyacushpayqui ama llutäpacunquichu. Runacuna ñacachishuptiquisi, chasquicunquiman. Mana yamacällar pii-maytapis Jesúspita willapanqui. Carguyquitapis sumaj charcunqui.

6 Wañuy janächüna caycan. Wañuchimaptin, Tayta Diosninchita jarashan-yupay yawarnipis jiçhash canga. **7** Murucucuna ñacashan-jina tucuy-jinanpa ñacashcä. Puclajcuna callpan ushyacashancaman puclashan-jina nuwapis llapan shungüwan cargüta charcushcä. Tayta Jesúspa shimin nishannylla cawar, willapäcushcä. **8** Tayta Diosninchipa shungunman tincushäpita allita chasquij-chasquij-jina Tayta Jesús alliman churamänanta shuyaraycä. Ichanga mana nuwallatachu alliman churamanga. Manchäga allillata rurashpan llapan shungunwan cutimumanta shuyarajcunatapis alliman churanga. Cutimushan junaj llapan runapa shungunta musyapar, allimanpis, mana allimanpis churanga.

Timoteuta yapay piñapashan

9 Timoteo, watucamaj juella shamunqui, ari. **10** Irmänu Demás imancunapäpis alläpa yarpaçhacur, quiquilläta jaguiraycamar Tesalónica marcaman aywacusha. Crescentina Galacia quinranman aywacusha. Tituna Dalmacia quinranman aywacusha. **11** Lucasllana yanagaycäman. Chaymi Marcoswan ishcaniqui shamunqui. Payga Tayta Diosninchipa shiminta willapäcpti, yanapämanga. **12** Tíquicuta Éfeso

marcaman caćhashcä. **13** Shamurga, punchütapis apacamunqui. Tróade marcačhu irmänu Carpupa wasinčhu jaguimushcä. Librücunatapis apacamunqui. Pitush-caj papilcunatapis jungamurunquiman.

14 Jiru tacaj Alejandrumi ichanga tucuy-jinanpa pampaman čhuramasha. Llutanta rurashanmantupu Tayta Diosninchi unyanta cutichinga. **15** Chay runaga imata willapäcushanchitapis pampaman čhuraycan. Chaymi mayaj-mayajlla canayquipaj willapaycaj.

16 Puntata Roma marcačhu auturdäman čhayapti, pipis mana nanachicamashachu. Llapanmi jaguiraycamasha. Jaguiramajcunapa unyanta Tayta Diosninchi ama yarparanmanchu. **17** Japallä caycaptisi, Tayta Jesús mana caćharimashachu. Manchäga waran-waran shacyaycächiman. Chaymi shiminta sumaj willapäcushcä jäpa runacunapis wiyacunanpaj. Maquinčhu purichimar, wañuypitapis jishpichimasha. Micucuj liyunpita washämaj-jina wañuypitapis washämasha. **18** Juchallicujcunapa maquinpitapis Tayta Jesús washämanga. Janaj pachaman shuntacamanga. Ñaupallančhu purichimanga. Chaymi paytaga imay-imaypis llapan runa alliman čhuraycullächun. Chaynuy caycullächun.

Cartapa ushyanan

19 «Pablush wamayaycäshunqui» ninqui mama Priscilata,* runan Aquilata, Onesíforucunata.

* **4:19** «Priscila» mama Priscapa cuyay cutin caran.

20 Irmänu Erastuta Corinto marcačhu jaguiycamushcä. Trófimutapis jishya chariptin, Mileto marcačhu jaguiycamushcä. **21** Tamya quilla mana čhayamushancamalla juclla shamunqui, ari. Irmänunchi Eúbulo, Pudente, Lino, irmäna Claudia, waquin irmänucunapis wamayaycäshunqui. **22** Tayta Jesús llapaniquita yanapayculläshunqui. Tayta Diosninchipis llaquipayculläshunqui. Chayllana.

**Mushug Testamento
New Testament in Quechua, Panao Huánuco
(PE:qxb:Quechua, Panao Huánuco)**

copyright © 2009 Wycliffe Bible Translators, Inc.

Language: Quechua, Panao Huánuco

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Quechua, Panao Huánuco

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

7054d98c-7632-5339-9ee8-560fc45d86cd